



河南府志卷之五十六

古蹟志二

都邑二

偃師 鞏 孟津

高辛故都

竹書紀年帝嚳高辛氏元年帝卽位居亳

帝

王世紀帝嚳都亳今河南偃師是也

括地志亳邑故城

在洛州偃師縣西十四里本帝嚳之墟商湯之都也

按高辛所都之亳世紀水經注括地志漢書音義

而以偃師去葛八百亳衆不能往耕饋食爲疑不知

卽位後自南亳徙西亳未受命與葛鄰

氏楷曰書序從先王居孔安國以先王指帝嚳也今按其書篇名帝告釐沃告當是通作嚳釐之言來蓋謂從帝嚳而來居于沃土云耳孔說非謬而水經注言帝嚳之墟在禹貢

河南府志

卷之五十六 古蹟志

都邑二



4001 7315

尸鄉是也今考偃師城西二里曰高莊與所謂十四里二十里者不合豈古人約畧計里本未精核耶抑今人所傳高莊未確耶地雖不可確指而要高辛都之爲偃師則無可疑耳

殷侯子亥故國

竹書紀年夏帝芒三十三年商侯遷于殷

帝泄十二年殷侯子亥賓于有易有易殺而放之十六年殷侯微以河伯之師伐有易殺其君綿臣

徐文靖竹書

統箋按商頌宅殷土芒芒鄭箋曰自契至湯八遷始居亳之殷地據竹書帝芒三十三年商侯遷于殷上距商侯冥死于河八十有二年此遷殷盖元冥之子子亥也世本相土居商其冥往河治水子亥遷殷孔甲復歸商其則此遷殷者正殷侯子亥也孔甲乃上甲之譌國語所謂上甲微

能帥契者元冥之孫子亥之子也計夏后帝芒三十三年
下距湯始居亳之殷地百六十年其時已先稱殷周氏曰
商人稱殷自盤庚始自此以前惟稱商而已今據竹書商
在夏已稱殷安在湯始居殷盤庚遷殷改商曰殷乎山海
經困民之國有人曰王亥托于有易河伯僕牛有易殺王
亥取僕牛郭注云河伯僕牛皆人姓名誤河伯伯爵前所
云河伯洛伯是也僕牛地名也殷侯亥賓于有易托處于
河伯僕牛之地有易乃殺王亥取僕牛如文八年取武成
昭八年取鄭之例不得以河伯僕牛皆爲人姓名也又困
民之國郭氏不注襄十四年傳若困民之主匱神絕望社

稷無主將安用之林唐翁注困民之主日困苦其民以主
其國山海經困民之國當如是解郭璞曰上甲微殷之賢
王假師以義伐罪故河伯不得不助滅之前漢書古今人
物表帝嚳妃簡媯生高禩五世孫冥冥子亥師古曰亥音
該據竹書亥卽亥也天問該秉季德又作該是亥讀爲亥
也亥子微滅有易所以報父之讐也國語曰上甲微能帥
契者也故殷人報焉

按盤庚遷殷說者皆以爲在河南偃師實因上甲微之
故居則偃師固上甲微所居之殷也而何氏指以殷地
在北蒙卽上甲父子之世所謂遷于殷者遂併謂
盤庚所遷之殷亦不在偃師是一誤而盡誤矣

商湯西亳故都

地理通釋書序湯始居亳從先王居挾地

志云宋州穀熟卽南亳湯都也宋州蒙城爲景亳湯所盟也河南偃師爲西亳湯卽位居南亳後徙西亳孔安國帝嚳居亳湯自商邱遷故曰從先王居杜預以景亳爲周地河南鞏縣西南有湯亭卽偃師也林氏曰鄭氏云亳在河南偃師鄭說可從蓋偃師在河南其地與周邑相近乃四方朝覲貢賦道里取中之地商頌曰古帝命武湯正域彼四方邦畿千里維民所止商邑翼翼四方之極使非河南則頌未必如此

按書序自契至于成湯八遷湯始居亳八遷者契始居商一也昭明居砥石二也相土居商邱三也冥離商邱在河治水四也子亥遷般五也孔甲之時復歸商邱六也湯自商邱遷亳七也自南亳徙西亳八也然雖有三

亳之名與立政所謂三亳阪尹者自異鄭注三亳謂分亳民爲三邑其長居險曰阪尹蓋東成臯南轅轅西降谷也而路史又有五亳之名一杜南一偃師一考城一景亳一鄭地而譙郡南亳不與焉此亳之異名也至杜氏謂鞏縣西南有湯亭實今偃師地不曰偃師而曰鞏縣西南者杜晉人晉省偃師地入鞏故偃師地在晉時率以爲鞏縣西南也

盤庚遷殷

書序

盤庚五遷將治亳殷民咨胥怨作盤庚三

篇

地理通釋

盤庚遷于殷曰先王不常厥邑于今五邦

馬氏曰五邦謂商邱亳囂相耿也林氏曰序言五遷自湯

至盤庚併數之此言五邦又言今不承于古則是盤庚之

前遷者有五攷之前序但有亳囂相耿之四者併盤庚數

之則盤庚歸亳不應謂之五邦太史公謂祖乙自耿遷邢

汲冢紀年謂祖乙遷奄此與序戾不可據意者更有遷而
史失之皇極經世盤庚五遷復歸于亳改號曰殷三代世
表云徙河南世紀盤庚復南居亳之殷地今偃師是也

按成湯以前已併有殷商之名湯徙西亳不名殷而名
商者重王業所自起也盤庚遷殷本名商而必改曰殷
者從先王之舊居也至竹書紀年謂盤庚十四年自奄
遷于北蒙曰殷何氏徐氏併篤信其說不知紀年雖古
信紀年不如信經經曰古我先王將多于前功適于山
所謂山者東成皐南轅轅西降谷也夫惟偃師有山北
蒙安得有山如是
則竹書不足信矣

又按書序成王既伐管叔蔡叔以殷餘民封康叔作康
誥酒誥梓材逸書作雜篇武王克殷乃立王子祿父守
商祀建管叔於東建蔡叔霍叔於殷俾監殷臣及周公
相成王誅管蔡俾康叔宇於殷俾仲旄父宇於東左傳
武王克商成王定之周公相王室以尹天下分康叔以
大路少帛繡棨旃旌大呂殷氏七族陶氏施氏繁氏綺

氏樊氏饑氏終葵氏封豶土略自武父以南及圃田之北竟取於有閭之士以共王職取於相土之東都以會王之東蒐聃季授土陶叔授民命以康誥而封於殷虛皆啟以商政疆以周索史記衛康叔名封武王同母少弟也其次尚有冉季周公旦以成王命興師伐殷殺武庚祿父以殷餘民封康叔爲衛居河淇間故商墟周公乃申告康叔謂之康誥酒誥梓材以命之據書序及逸周書在傳史記皆謂封康叔在成王之世然於誥中稱朕弟寡兄顯考文王等語固未有以解也於是先儒多據經立義以爲武王告康叔之書然當武王時封紂子武庚置三監監殷各有分地殷故都猶爲武庚有也武王何以明太命乎沫邦乎如是則以爲武王告康叔者又無以解也竊意史記申告之語乃武王先有誥於前至周公相成王蓋稱述前誥而申之故三篇文多不相屬而康誥前惟三月哉生魄周公初基作新大邑於東國洛四方民大和會侯甸男邦采衛百工播民和見士於周周公戒勤乃洪大誥治凡四十八字先儒謂當刪置洛誥篇首今細繹前後文義封康叔而先言作大邑於洛者卽庶殷攻位於洛者也見士于周者殷民趨事也周公咸勤者慰勞殷民也洪大誥治者誥康叔也慰

勞殷民而乃誥康叔者謂康叔能種殷民攻位於洛也
康叔所和之殷民卽左氏所謂分康叔以殷氏七族也
鄭氏詩譜謂武王封紂子武庚爲殷後殷民化紂日久
未可以建諸侯乃王命其地使三叔尹而教之自紂城
而北謂之邶南謂之鄘東謂之衛後三監以叛誅乃於
三國建諸侯封康叔於衛使爲之長夫管蔡霍雋別有
封國則邶鄘衛固非三叔之國武王時但使尹而治之
耳邶鄘不詳其始封衛在武王時已封康叔但以康叔
幼不使之國使率殷七族於東都故周公營洛得以見
士于周迨三監旣誅乃使之國逸書所謂成王誅管蔡
俾康叔宇於殷也武王封康叔已有誥詞周公述武王
之詞而復紬繹其意以施于沫邦故以爲王若曰云云
若曰者王之意如此非舊詞盡如是也或曰周公未營
洛時王城下都皆未立今謂康叔率殷七族於東都當
在何地也曰西亳殷土也地接成周當爲康叔之所居
今偃師有施谷昭二十六年傳所謂王城人劉人戰于
施谷者也又有榮錡氏左傳杜註所謂鞏縣西有榮錡
澗者今偃師地也榮錡氏當卽殷氏七族之錡氏施谷
當卽殷氏七族施氏之居

商下洛城

春秋繁露湯以神農爲赤帝作宮邑於下洛之

陽

按括地志河南偃師爲西亳湯卽位南亳徙西亳水北曰陽偃師在洛水北故曰陽不曰洛陽曰下洛之陽者據商州有上洛後漢書杜篤傳成周之隆乃卽中洛夫上洛商州也中洛成周也則下洛乃偃師也湯徙西亳偃師故春秋繁露以爲湯作宮邑於下洛之陽路史以潘城在下洛城西南又以爲文昭之分是潘城爲周畿內國也今攷偃師西南無潘城而洛陽東南有潘寨潘邨疑卽潘城但其去偃師倍乎四十里之數恐非是故水經注以下洛潘城入濕水下彼所謂下洛亦非繁露所謂下洛之陽

周鄔邑

春秋傳隱十一年王取鄔劉蔿邾之田於鄭莊二

十年王及鄭伯入於鄔遂入成周昭二十四年子朝入於

鄔杜注緱氏縣西南有鄔聚

周劉邑

水經注劉水出半石東山西北流于劉聚三面臨

澗在緱氏西南周畿內劉子國左傳杜注緱氏西北有劉

亭

路史劉康公邑在緱氏杜云有劉亭或云魯地非也

襄十五年盟于劉地不在周世作劉繆故說文惟有繇然

古亦無之詳字經

按劉繇劉古今字異耳至劉邑杜氏以爲在緱氏西北指劉亭而言也水經注以爲在緱氏西南通指劉澗而言也

周滑國

路史滑伯爵鄭入而秦滅之今偃師緱氏鎮有古

滑城非滑州弗費也今河南緱氏滑都也與魯費異春

秋大事表滑杜註本鄭邑今偃師縣緱氏故城卽古滑地

高氏曰滑本國名秦滅之而不能有爲晉所得然其地近鄭在所必爭成十七年鄭人所以侵晉虛滑也是時則歸王室逮定六年鄭伐周馮滑胥靡此鄭人爭滑之驗也

按晉呂相絕秦曰殄滅我費滑羅莘注路史費禹後滑本費城一地也今其地猶名滑城在轅轅西北

周胥靡城

方輿紀要胥靡在偃師縣東南四十里左傳襄

十八年楚伐鄭侵費滑胥靡後亦爲周邑昭二十六年子朝之亂敬王入于胥靡次于滑定六年伐鄭胥靡乘周大夫儋翩之亂也晉使閻沒戍周且城胥靡卽此

按胥靡在偃師東南近滑城今滑城在鞏偃界上滑城東南地盡入鞏則胥靡城當在鞏今鞏地近滑者有曰趙城曰蕭相蕭相者胥靡之轉音也趙城者周城之轉音也特無他確証姑作偃師東南城耳

周侯氏

春秋大事表荀躒軍于侯氏杜註周地卽緱氏今

偃師縣東南二十里有廢緱氏城

周東園

春秋大事表單氏伐東園路史周地杜註洛東面

有園鄉

按晉時所謂洛東地今盡入偃師

周尹氏邑

春秋昭二十三年傳六月壬午王子朝入于尹

己丑召伯奭南宮極以成周人戍尹

路史尹周地尹氏

采杜謂鞏西南偃師今汾州有吉甫墓記卽其邑

按吉甫在宣王時故汾州得有尹邑若東遷後尹氏之采安能在汾州乎自以偃師爲是

周尸氏

春秋昭二十六年傳五月戊午劉人敗王城之師

于尸氏 水經注班固曰尸鄉故殷湯所都者也故亦曰湯亭晉太康地理記竝言田橫死於是亭故改曰尸鄉非也余按司馬彪郡國志以爲春秋之尸氏也

周施谷 春秋昭二十六年傳四月戊辰王城入劉人戰於施谷

萑谷 春秋昭二十六年傳七月丁丑王次于萑谷 杜註周邑 春秋大事表按大谷在今洛陽縣東後漢書孫堅進軍大谷距洛九十里其谷連亘至潁陽縣何進設八關大谷其一也周之萑谷施谷蓋皆大谷之支徑

按大谷今水泉口其山界洛陽偃師登封三縣地山石峻峭礪礪可以置關不能容邑據傳王城與劉人戰當

是近劉山谷之
邑故入偃師

周止國 **路史**少昊後偃姓國曰止今首陽北故曰止陽

周紀國 **路史**紀今緱氏故紀縣周之餘族可見者

漢偃師故縣 **水經**洛水又東過偃師縣南 **酈注**洛水又東

偃師故縣南與緱氏分水 **穀水注**穀水又東逕偃師城

南皇甫謐曰帝嚳作都於亳偃師是也王莽之所謂師氏
者也 **名勝志**偃師故城在縣西十里周武王伐紂回偃

息師戎于此故名

按偃師漢所置晉省入鞏洛故漢桑欽曰偃師縣魏酈
道元則曰偃師故縣也隋開皇十六年復置則爲今偃
師縣治其故縣在縣西十里今辛寨曰辛寨者亦謂高
辛故都也又前漢書注偃師莽曰師成而水經注則曰

王莽所謂師氏或疑氏字誤當作師成或疑師字誤當作尸氏吾以爲二說皆非也後漢書曰匿師有尸鄉尸鄉在縣西則以爲卽尸氏者固不可若顏師古注前漢尚在酈道元後亦未見顏精于酈師氏爲誤嘗讀皇霸文紀載古寅簋銘曰有進後雱邠人正之師氏人云云凡一百五十八字乃知師氏之名蓋古有之王莽篡逆而凡事妄謂反古則師氏之稱固舊所自來矣

漢緱氏城

史記武帝紀公孫卿候神河南見仙人跡緱氏

城一有物若雉往來城上天子親幸緱氏城視跡問卿得

毋效文成五利乎

漢延壽城

水經注

休水又逕延壽城南緱氏縣治故滑費

春秋滑國郡都王莽更名中亭卽緱氏城也

方輿紀要

延壽關縣南三十五里晉永康二年齊王冏舉兵許昌討

趙王倫倫遣兵出延壽關以拒之或謂之延壽城廬氏

嵩山記子晉學道于洛鹿澗澗旁有靈星塢一名延壽城

此塢有道士浮邱公接其登仙之所又漢書李膺罷歸緱氏教授生徒給事論鄭注于此處

按延壽城卽緱氏城在今古滑城南臨休水水外卽緱山自戰國以來爲周邑爲韓邑爲漢縣晉及後魏皆在古滑城非今緱氏鎮也今緱氏乃隋大業所改詳在下

漢袁術城水經注合水注于公路澗世俗音譌號之曰光

祿澗非也上有袁術固四周絕澗迢遞百仞廣四五里有一水淵而不流故谿澗卽其名也

按古謂固猶今謂城也